

四庫全書

史部

欽定四庫全書

史部

關中勝蹟圖志卷三

詳校官太僕寺少卿<sub>臣</sub>李廷欽

編修<sub>臣</sub>程嘉謨覆勘

總校官進士<sub>臣</sub>朱鈐

校對官助教<sub>臣</sub>胡予襄

謄錄監生<sub>臣</sub>呂沛惇

欽定四庫全書

關中勝蹟圖志卷三

陝西巡撫臣畢沅撰

大川

附水利

西安府渭水在府北三十里西自咸陽流入境逕長安縣北書禹貢導渭東會于澧又東會于涇周禮職方氏雍州其浸渭洛關中記渭與涇洛為關中三川又涇渭灞澹鄠鎬漆澗為關中八川水經注渭水又東豐水從

南來注之

謹按地說渭水與豐水會于短陰山今名短陰原在咸陽縣西南二十里

又東北

與鎬水合

謹按鎬水於昆明池西北入渭在咸陽縣界

又東北逕渭城南

謹按

今咸陽縣東北十七里有渭城縣故城

次水注之

謹按次水入渭在今長安縣界

又東分

為二水又東與次水枝津合又東逕長安城北

謹按今長安縣

西北十三里有長安故城

又東逕霸陵縣北

謹按霸陵今屬咸寧北周庾信望渭水詩樹似

新亭岸沙如龍尾灣猶言吟暝浦應有落帆還隋柳諍奉和春日臨渭水應令詩飲馬投錢岸解釣剖璜津風

絲曳香餌覆杯懷昔人唐沈佺期上巳日祓禊渭濱應制詩寶馬香車清渭濱紅桃碧柳禊堂春皇情尚憶垂

竿佐天祚先呈捧劍人

臣謹按關中巨浸首號八川司馬相如上林賦云終始灞漚出入涇渭澧鎬潦漚紆餘委蛇經營乎其內蕩蕩乎八川分流相背而異態釋之者曰長安之地潏鎬經其南涇渭遶其後灞漚界其左澧潦合其右此固禹周之故道也自西周而後以迄西漢隋唐建都於此歷代相承鑿引諸川以便輓輸資汲取溉田畝灌苑囿津梁交午離合不常渭南諸川盡失其舊以今考之八川中惟涇渭潏漚漚水尚可尋其故蹟

至澧水自漢王商穿長安城引內澧水注第中其流  
即徙故詩云豐水東注而漢志則云北過上林苑入  
渭則是北流而非東注矣又鄭當時開漕渠靈軹富  
民昆明諸渠皆橫絕澧鎬為之唐貞觀中堰豐鎬入  
昆明池又於京城西北引澧水為漕渠合鎬水北流  
由禁苑入渭太和以後石閘堰廢而昆明池涸澧鎬  
亦俱斷流是以關中八水今僅得有其六又唐貞元  
四年蒲水泛溢縣志云自是而後遷徙無常是以現

行水地經流脉絡雖尚沿習舊名至求禹蹟周原之故躅大半遷流紛錯無可尋求矣

豐水在長安縣西南四十里自鄠縣界流入又北至咸陽入渭詩大雅豐水東注一作澧書禹貢澧水攸同又作鄴漢書地理志鄠縣鄠水出東南長安志豐水出豐谷源濶十五步自鄠縣界來終縣界由馬坊鎮入咸陽流至宋村入渭雍勝略豐水出豐谷北流其西高冠太平二谷水入焉東則雪谷龍羸西和白石羅什諸谷水

入焉為西交河又北有東交河水入焉

滴水在長安縣南二十里一統志源出南山石鼃谷自咸寧縣界流入又西北入渭括地志一作沈水許慎云滴水在杜陵即今所謂沈水也水經注沈水上承皇子陂于樊川西北流入渭一名高都水長安志滴水東自萬年縣界流入交水一名漕水太平寰宇記漕水即沈水也一名坑河一名皂河通志皂河即漕河之謠也自牛頭寺

在韋曲杜曲之間

入縣境西北流至丈八溝

在縣西南十五里



一分流為通濟渠一西北流逕三橋鎮入渭

交水在長安縣南三十二里源出咸寧縣南山西北流至縣界入豐水宋張禮城南遊記樊川御宿之水交流故名交水西合于豐北入于渭一名福水太平寰宇記福水即交水也通志一作湑水

鎬水在長安縣西南詩大雅考卜維王宅是鎬京書傳大王作豐武王理鎬鄭康成云豐在鎬水之西鎬在豐水之東相去蓋二十五里一稱湑池史記秦始皇本紀

三十六年有人持璧遮使者曰為吾遺瀉池君集解孟  
康曰長安西南有瀉池水經注鎬水上承瀉池十道志  
瀉池一名元趾在昆明池北始皇毀之汔漢武帝穿昆  
明池而周京故趾益無可究雍勝略鎬水源出太乙山  
西谷中北流迤西得石鼈豹林諸谷水過御宿川北香  
積寺南西合滴水為東交河又西入豐水

御宿川在長安縣西南四十里漢書揚雄傳武帝廣開  
上林南至御宿昆吾或作御宿顏師古漢書注御宿在

樊川西通志御宿川北岸之西滴水來會為東交河南岸之西為西交河又西為豐水又北至定昆池為豐鎬之間又北為鎬入豐處御宿之地盡矣

臣謹按三秦記樊川一名御宿程大昌雍錄從之今攷樊川在咸寧縣南不得與御宿合而為一詳見卷後

永濟渠本名通濟渠源出南山大義谷西行過杜韋二曲至咸長交界經沈家橋漸轉而北過丈八頭閘由長

安西門入城項忠通濟渠記宋大中祥符間知永興軍  
事陳堯咨嘗引龍首渠水自城東入以便人用成化改  
元予巡撫陝西民言去城西南十五里地名丈八溝若  
能西導入城人用之餘可泄之池以環厥城再餘洩經  
九龍池入于漣從之功成命名通濟余子俊通濟渠記  
通濟渠水出咸寧大義谷正派合小義谷炭谷之水為  
湏河即交河支派第一派為龍首渠此派東北流第二派無  
名第三派為胡公堰引水經流咸寧義峪里與阿姑泉

合流為皂河經流諸處至丈八頭作閘引水入西安府

西城壕為通濟渠

已上  
長安

臣謹按農田為民生之本計而灌溉所資必需水利  
關中據百川上流導引甚易昔人謂陝西無地不可  
興舉水利故渠堰視他省為多今通計西安等府州  
所屬四十七州縣共渠一千一百七十一道灌田六  
千四百五十餘頃其經流之大者如西安省城東有  
龍首西有永濟兩渠同出於大義谷第一派之水龍

首由小義太乙二谷之間北行又轉而東由咸寧東

長樂門入城

詳見咸寧

永濟由大義谷水源西行過咸長

交界為碌碡堰北行至分水閘分水閘一支為丈八

頭入澧河又北逕南窰頭由長安西安定門入城蓋

關中土厚水深宋陳堯咨謂城內井泉大半鹹苦二

渠分流壓閘民間汲引利賴實殷又不僅為田畝輸

灌所資也永濟一渠自明成化元年開通而後至明

末未經毀會我

朝康熙三年撫臣賈漢復始議疏濬六年重修旋復堙

塞臣自蒞任以來以茲渠為會城日用所關議加濬  
治並委大員專司督辦將遠城壕溝挑挖寬深現今  
水勢疏通長流不竭既足以利田功更可以資汲取  
至各屬渠堰每歲俱於入春以後土膏萌動督飭各  
州縣詳加相度各就本境起覓民夫分別修濬臣復  
令地方大員親履察勘務令堙廢者漸次興修而流  
通者灌溉優渥於民間農田水利庶有裨益云

渭水在咸寧縣北三十里自長安界流入又東逕高陵入臨潼縣界

滴水在咸寧縣南三十里西北流入長安界通志滴水源出南山石鼃谷分為二支一自西北流會鎬水為交河入渭一自東岸會樊川北流入城為永濟渠

樊川在咸寧縣南三十五里雍勝略一名後寬川一名華嚴川即滴水所經也十道志即杜陵之樊鄉漢高祖以樊噲灌廢邱功賜食邑於此三秦記長安正南秦嶺



額根水流為秦川一名樊川城南記樊川在湔水河北渠南西北為杜曲又西北為常曲又西為華嚴寺寺西為鴈鶩陂西北有第五橋又迤北為瀉池樊川之地盡矣咸寧縣志自義谷西北四十里至塔陂川入長安界漕水在咸寧縣東十五里自藍田界流來合灞水水經注長水亦謂之荆溪自白鹿原西北流左合狗枷川水又北入霸縣有溫泉入焉亂流注于霸長安志藍田庫谷水北流二十五里合採谷石門谷水下流入荆谷水

號漚水又下流二十五里合灞水又北流二里入渭通志  
澇川在城東南三十里焦戴川自東南來澇川自西南  
來兩川相合為漚與樊川御宿號為三川

灞水在咸寧縣東二十一里自藍田縣來合漚水北流  
入渭水經注霸水源出商州逕藍田縣左合漚水歷白

鹿原東又北合長水

即荆  
溪水

又北會兩川

即狗柳焦  
戴二川

又北

入渭

龍首渠在西安府城東南咸寧縣界咸寧縣志龍首渠

一名清水渠隋開皇初堰漉水至大興城東南入城唐  
分為二渠一西入通北門至興慶宮景龍池又西入西  
內太極宮一北入東苑至龍首殿為龍首池又注凝碧  
積翠二池又西北入大明宮後灌太液池五季後涸宋  
史河渠志大中祥符七年陳堯咨知府事以城內井泉  
鹹苦乃相度城東二里之龍首渠其水清甘可五六十  
丈開引入城散流廛閭民咸賴之

謹按隋唐分東西二  
渠宋止修西渠故道

東渠填廢  
已上咸寧

臣謹按龍首渠與永濟渠同發源於大義谷第一派之水東過真武原至引駕迴鎮又東北至鳴犢鎮入漕河復引水入渠口西北行經留空村至田家灣諸處

詳見圖內

經流漸細明成化間曾經疏濬我

朝康熙三年撫臣賈漢復復加修濬今惟上流甫高村江村等處灌田四百餘畝其入城故道尚俟集議修復焉

渭水在咸陽縣南一里自興平縣流入西合澇水東合

泥渠又東合豐水南逕鄠縣界又東入長安界

澇水

澇本作澇

在咸陽縣西南二十里源自鄠縣來北流逕

縣境入渭

泥渠水在咸陽縣南十五里源出鄠縣化羊谷流入縣境又東北逕釣魚臺入渭一名扈水

豐水在咸陽縣東南三里源自鄠縣終南山豐谷流入

長安界逕縣境北流入渭水經注渭水與豐水會于短

陰山

謹按即短陰原在縣西南

長安志豐水自長安界來流至宋村

入渭其水緣南山交水合流又有祥谷水白谷水俱合於豐

涇水在咸陽縣東北四十里自醴泉之谷口來東南流過咸陽入涇陽界書禹貢涇屬渭汭詩邶風涇以渭濁湜湜其沚釋文涇濁水也周禮職方氏雍州其川涇汭咸陽縣志涇水在畢原下流至咸陽涇陽之交曰鹿臺東注高陵秦中八水咸陽有四焉

已上咸陽

渭水在興平縣南二十里自武功縣流入與蓋屋分界

又東入咸陽界水經注渭水又東芒水從南來注之又東逕槐里縣南又東與芒水枝流合又東北逕黃山宮南就水注之又東合田溪水又東逕槐里故城南漏水北入之又東合甘水

謹按槐里故城在今縣西又芒水及諸水俱在渭水南詳見蓋厘

川河在興平縣西南渭河之北自武功縣川口流入凡

三支其自武功西北來者曰漆水俗名遊豐河

源出麟遊自

武功東北來者曰沮水亦名浴水俗名沐浴河

源出永壽自

武功西南來者曰漳水俗名渾水河

源出鳳翔

漆沮二水合

流于武功縣東五里其下流又合漳川水經川口東流

入本縣界又東南入渭通志即雍水

已上興平

渭水在臨潼縣北十五里自咸寧流入其南東為斜口

河又東為水磴河

在縣西五里源出磴子谷

又東為石澗河

在縣西二里源

出驪山南澗謂之冷水以別溫泉也

又東為潼水臨水

二水自縣北合流

又東為

陰槃河

在縣東北十四里源出縣北陽村社

又東為新豐河又東為戲水

又東為冷水其北為清水自西北來北與石川河會

至交口渡并入于渭東出渭南界臨潼縣志渭水與



涇水合至臨潼而益大

潼水在臨潼縣西一里縣志源出驪山西繡嶺即飲濟泉也流至縣西門外數百步合縣東之臨河入渭臨河

源出驪山東繡嶺

謹按潼水即溫泉詳見古蹟

新豐河在臨潼縣東十五里一名魚池水水經注魚池水出驪山本東流秦始皇造陵取土其地汙深水積成池謂之魚池周迴四里水西北流逕始皇冢北又北逕鴻門西又逕新豐縣故城東又北入于渭

戲水在臨潼縣東二十七里顏師古漢書注戲在新豐  
東今有戲水驛其水出藍田北界橫嶺至此北流入渭  
兩京道里記周幽王與褒姒遊於此故名水至濁

泠水在臨潼縣東四十里接渭南界太平寰宇記泠水  
別名百丈泉長安志泠水一作零水縣志零水源出渭  
南縣南山北西北流逕新豐原之右又北逕零口鎮入  
渭

漆沮水在臨潼縣東北四十里渭水北北自富平縣流

入又南入渭書禹貢渭水又東過漆沮入于河魏書地

形志萬年縣有漆沮水

謹按萬年故縣即櫟陽鎮在今縣東北

水經注沮

水更名石川河長安志石川河在櫟陽縣東三十里自

華原富平兩縣界來

謹按華原今屬耀州

合渭水縣志石川河自

富平斷原入縣境東逕康橋受葡萄河水又折而南至

相橋與清水合流至交口渡入渭其葡萄河發源富平

之溫泉至康橋西流入漆沮其水微溫冬月不冰中多

鱉蛤

清水在臨潼縣北五十里自高陵界來東流合石川河  
水入渭水經注清水東南入萬年縣謂之五丈渠長安  
志即冶谷水下流也縣志清河自三原高陵界隨荆山  
東下至黑策橋折而南至櫟陽鎮復折而東至相橋入

石川河

已上  
臨潼

渭水在高陵縣南十里自咸寧界西南流入又東入臨  
潼界書禹貢渭水又東會于涇縣志渭水在縣南每遇  
泛漲瀾漫十餘里然皆南徙其北岸為諸原所障故曰

高陵

涇水在高陵縣西南二十里水經注涇水逕涇陽縣南  
東入高陵界又東逕毘沙鎮南鹿苑原北至上馬渡合  
于渭彭城堰在高陵縣西北三十里唐書地理志高陵  
有白渠寶歷元年縣令劉仁師請更水道渠成名曰劉  
公渠新堰成曰彭城堰通志今閘址猶存自彭城閘而  
東分五渠北為中白渠即龍洞渠正身南行為中南渠  
又東行為昌連渠

渠分二支

逕高陵縣城北中南渠又南為

金史地理志卷三  
高望渠又南為禍南渠東南行至船張村入渭

已上高陵

渭水在鄠縣北三十里自蓋屋界流入又東入長安界  
澇水在鄠縣西二里流入咸陽界山海經牛首之山澇  
水出焉水經注澇水出南山澇谷長安志澇水至縣北  
之元村入渭一作潦水李善上林賦注潦水即澇水也  
直谷水在鄠縣南合白雲山水北行逕縣東呂公河西  
行入澇水

扈陽谷水在縣東二十里北流入咸陽界水經注扈水

上承扈陽池十道志一名扈水今名馬腹陂縣志鄆南  
化羊谷谷有水出焉本名扈陽其水流至咸陽縣為泥  
渠之上源

太平谷水在鄆縣東南三十里北流入長安縣界合豐  
水太平寰宇記太平谷水一名林谷水源出終南即清  
水渠之上流縣志太平谷中有鳳池即水之源也東為  
高冠谷水源出高冠谷谷有石穴石潭潭最靈旱禱輒  
應

金匱要略卷三  
豐水在鄠縣東三十里流逕長安入咸陽界漢書地理志鄠縣豐水出東南北過上林苑入渭又司馬相如傳注豐水出鄠縣南山豐谷縣志豐水自紫閣而下逕秦渡鎮北入渭

漢陂水在鄠縣西五里十道志本五味陂陂魚甚美因誤名之長安志漢陂出終南山諸谷合胡公泉為陂唐寶歷二年勅漢陂令尚食使收管不得雜人採捕其水任百姓溉灌勿令廢碾磑之用文宗初詔並還府縣劉



士龍漢陂記山谷之水並胡公白沙諸泉合而北注漢  
陂受之自陂頭南至曲抱村可數里許高岸環隄一泓  
蕩漾層巒疊嶂影落其間縣志陂西又有錦繡溝即漢  
陂之上游至漢陂二里許元季以後以陂魚可治痔遊  
兵決陂取之陂遂廢其地皆為水田明末知縣張宗孟

重加障築其胡公泉在縣西南十里丈八村

唐杜甫漢陂行岑參

兄弟皆好奇攜我遠來遊漢陂天地點慘忽異色波濤  
萬頃堆琉璃琉璃汗漫泛舟入事殊興極憂思集鼉作  
鯨吞不復知惡風白浪何嗟及主人錦帆相為開舟子  
喜甚無氛埃鳬鷺散亂棹謳發絲管啁啾空翠來沉竿

續蔓深莫測菱葉荷花靜如拭宛在中流渤澥清下歸  
無極終南黑半陂已南純浸山動影褻宛冲融間船舫  
暝夏雲際寺水面月出藍田闕此時驪龍亦吐珠馮夷  
擊鼓神龍趨湘妃漢女出歌舞金支翠旗光有無咫尺  
但愁雷雨至蒼茫不曉神靈意少府宴漢陂得寒字應為  
哀樂何其多又與鄠縣源大少府宴漢陂得寒字應為  
西陂好金錢盤一餐飯抄雲子白瓜嚼水精寒無計迴  
船下空愁避酒難主人情爛漫持答翠琅玕岑參與鄠  
縣羣官泛漢陂詩萬頃浸天色千尋窮地根舟移城入  
樹岸澗水浮村間鶯驚簫管潛蚪傍酒樽膜來呼小吏  
列大儼歸軒  
已上鄠縣

灞水自商州來入藍田縣東境逕縣城南至白鹿原西  
北行入咸寧界元和郡縣志灞水東南自商州上洛界

流入又西北合漚水入渭通志源出縣東南秦嶺倒迴  
谷西史記封禪書注灞水一名藍谷水一名滋水水經  
注滋水秦穆公更名霸水以顯霸功

臣謹按言灞源者其說不一蓋南北水道皆由秦嶺  
而分其東南入商州境者為丹西北入藍田境者為  
灞即牧護關水也所入諸水志乘語多歧出今攷其  
南岸之西入灞者為庫谷水又東為石門谷水又東  
合採谷及狗枷焦戴二川水又東輞谷水入之又東

金匱山志卷三  
藍水及留峪水入之其北岸之東入灞者為銅谷傾  
谷二水又西安溝水入之又西土膠河水入之又西  
潯水入之又西注水入之又西沙河水入之又西紅  
河水入之又西北入咸寧縣界

狗枷川水在藍田縣西南五十里長安志狗枷東川水  
出終南山

荆谷水在藍田縣西南入咸寧界咸寧縣志荆谷水一  
名荆溪本名長水縣志荆谷水發源秦嶺荆谷西北合

廣谷庫谷石門谷諸水經白鹿原東流入漣庫谷水在  
縣西南五十里又瀉川在縣西南又焦戴川在縣西三  
十里又採谷水在縣西南三十里其水俱北流合漣入  
渭

石門湯泉在藍田縣南四十里俗名湯峪縣志有泉五  
曰玉女融雪連珠救玉濯纓可療風濕

木峪溝水在藍田縣西二十里通志下流入堰兒溝經  
咸寧界入漣河相近雙溪水自章坡流來入鯨魚溝經

咸寧之高橋入漚河

輞川在藍田縣南八里長安志輞川出南山輞谷北流入灊通志輞川在縣南嶢山之口其水淪連如車輞然一名渥水水經注渥水西繞嶢關北歷嶢柳城又西北流入灊水

藍水在藍田縣東南三十里雍勝略藍水發源秦嶺北逕藍關藍橋過王順山下西北流入灊水縣志一名清河

留峪水在藍田縣東南出藍田山東谷長安志一名泥水又名青泥水水經注青泥水歷曉柳城南即此又銅谷水出縣東銅谷傾谷水出縣東傾谷二水合流西注泥水

土膠河在藍田縣東北里許以其混濁故名今譌為土橋河本名白馬谷水長安志水出縣東白馬谷南流逕縣東又西南入灞水

洧水在藍田縣北三里又注水在縣北五里源出青岡

卷三  
四又沙河在縣北二十里又紅河在縣西北並流入於  
灞

澧水在藍田縣西北雍勝略澧水出藍田南山谷西北  
流至咸寧界得荆谷廣谷採谷石門庫谷諸水過白鹿  
原西又過省城東合灞水北入渭

已上  
藍田

涇水西自醴泉流入逕涇陽縣南東入高陵界水經注  
涇水東流歷峽謂之涇峽又東南逕瓠口鄭白二渠出  
焉縣志涇水自縣西北仲山九峻之間出谷口始落平



壤以在縣南故以名縣

清谷水在涇陽縣東北自淳化流入逕嵯峨東麓出谷南流逕清涼原謂之靖川

謹按其地有唐李靖故居故名

又折而南合

治谷水

治谷水在涇陽縣西北自淳化流入又東合清谷水入三原界縣志治谷水當仲山東嵯峨山西出谷處為臨江潭在縣西北六十里瀑布飛激俗呼龍潭至縣東北合清谷水通志潭東有文川水北接百頃原水村種植

花木望之甚麗故名

龍洞渠在涇陽縣西北六十里鑿仲山龍洞引龍洞泉

東會篩珠洞泉西會倒流泉

謹按此泉今半入渠半入涇

又東會瓊

珠洞泉

謹按數泉中此泉最大

又東過水磨橋

謹按此橋與下大旺野狐趙家三橋

俱防北山雨漲水從橋上注涇使渠身不致衝塞

水磨橋之西有大小梯子崖

崖下有中渠井又東至水磨橋大旺橋會倒流泉水

謹按

此泉在大旺橋下與篩珠洞下者另一泉

又東會噴玉暗流鳴玉調琴四泉

過倚虹橋又東為退水槽

謹按退水槽乃水足時使渠水由槽入渠之所

又東

為涵碧池又東為野狐橋又東過趙家橋又東南為樊

坑渠過馬道橋渠至此始出山就平陸開渠灌田首為

王屋一斗至四斗與醴泉分灌田畝自張房一斗至白

公斗凡二十六斗東為上中下三限閘俗名三渠口其北限

為北白渠一名大白渠今名下白渠從閘口分水東北流南北兩岸

凡六斗入三原界詳三原大白渠下中限為中白渠今名下渠係

龍洞渠正身南北兩岸凡七斗又東為高陵之彭城閘

詳高陵彭城堰下下限為下白渠一名小白渠今名下南渠從南岸開斗凡

五皆溉涇陽田畝者

已上涇陽

臣謹按古來言水利者首稱關輔而龍洞一渠尤為秦民衣食之源關內膏腴之最其在秦時號鄭國渠漢名六輔太始二年趙中大夫白公復請開鑿因名白渠後漢遷都雒陽兩渠之利漸廢晉建興四年劉聰使劉曜寇長安曜陷馮翊進至涇陽  
涇水以北渭北諸  
城悉潰遂逼長安義熙十三年劉裕伐秦王鎮惡自河入渭秦主泓遣其將姚彊等合兵屯涇上拒之為

鎮惡所敗其時涇水左右皆戰地矣宇文周以後渠  
堰之利復起唐永徽六年太尉長孫無忌奏開白渠  
天寶以後涇渭之間屢遭寇亂廣德二年回紇吐蕃  
逼奉天還攻涇州是時勢豪之家復多引涇水營私  
利民生益困大厯十三年勅毀白渠碾磑以溉民田  
杜佑曰秦漢時鄭渠灌田四萬頃白渠溉田四千五  
百頃唐永徽中兩渠灌浸不過萬頃大厯中減至六  
千頃畝腴一斛歲少四五百萬斛復兩渠之饒誘農

夫趣耕河隴可復也豈徒自守而已哉劉禹錫曰涇水東行注白渠醜而為三以沃關中按水部式決洩有時畎澮有度少尹一人行視之白渠之利不廢關中可無磽瘠憂也宋史淳化二年涇陽民杜思淵請修石翼以堰水乾德至大觀間屢加修復惟大觀中溉田三萬五千餘頃差與秦等元大統八年復疏導之至大初御史王琚請於豐利渠上更開石渠明洪武中修復永樂以還項忠余子俊阮勤等並鑿石通

水引涇入渠水分三限皆立斗門以均其利

本朝順治九年邑令金漢鼎重修廣惠渠就谷口上流分水入渠後涇水奔瀉石堰遏之其怒逾甚土石承委不得不胸渠高水低勢不能引後鑿石渠深入數丈得泉源漢涌而出四時不竭涓涓滔滔經絡諸邑其利倍於涇水康熙八年邑令王際有修之厥後日漸淤塞雍正五年二月十六日奉

上諭朕聞得陝西鄭渠白渠龍洞向來引涇河之水溉田甚

廣因歷年既久疏濬失宜龍洞與鄭白渠漸致淤塞堤堰大半坍塌醴泉涇陽等縣水田僅存其名深為可惜朕特令該督岳鍾琪詳酌興修今據該督親勘奏稱龍洞急宜挑挖鄭白渠務當疏濬更須修築堤堰建設閘口以俾堅久已於西安布政司庫貯公用羨餘銀先動一千兩委員將龍洞鄭白渠及時挑濬其建閘工料約估銀七千兩請亦於司庫存貯羨餘銀內動用等語朕惟興修堤堰乃於民生大有裨益之事著動用正項錢糧俟一切工程告竣



造報工部查核務期渠道深通堤堰堅固俾農田得以永賴以副朕保惠元元之至意欽此督臣岳鍾琪奉

日築濬自龍洞以下淤塞盡去計增高水堤四百三十五丈餘石堤一百三十七丈餘土堤一千八百丈費帑五千三百六十餘兩涇陽醴泉三原高陵臨潼五縣皆饒灌溉七年總督查郎阿以渠工需員專理

題請西安管糧通判改董水利駐涇陽之王橋鎮俾得隨時修葺無廢厥工乾隆二年三年兩奉

諭旨修濬計高水堤五百五丈餘石堤九十一丈餘土堤  
千七百六十丈餘共費帑五千三百七十餘兩迄今  
保固無虞惟是昔日鄭國開渠之始渠與河平涇水  
順流而入又東合冶清濁三谷及薄臺石川諸河東  
北注洛故能溉田四萬餘頃自鄭渠廢而白渠興循  
涇而流東南注渭其所灌者才及鄭渠什一耳厥後  
河流日下渠身益高宋之豐利元之王御史新渠明  
之廣惠通濟皆刊山鑿石力爭上流其始未嘗不灌

既優渥而後卒不繼者總由涇水在山勢甚洶湧木石因堰旋設旋衝兼之石渠狹隘涇水泥多司事者又以歲修動項有限視為故事奉行以致閱年既久滓泥積疊渠底既高水源必致旁溢察閱近今冊籍志乘所灌下流田畝僅稱五百六十餘頃倘再不為經畫必至淤塞斷流使數千年之利漸至湮沒良可惜也臣於乙未三月親赴涇陽率同屬令由趙家橋躡屨沿隄行二十餘里直至仲山洪口周覽情形始

悉古今時勢異宜引涇入渠之說斷不能行歸與司  
道集議先為疏濬下流務令渠底深通自龍洞至王  
屋一斗計開通二千三百九十四丈放入民渠水行  
一百三十四里分灌醴泉涇陽三原高陵地畝計得  
一千餘頃將來增高倍薄盡收兩岸之泉漸次開導  
鑿山再引上流之水則浸灌之澤無難超軼宋元上  
與元鼎太始之間方其美利矣

清谷水自耀州流入東南逕涇陽復逕三原縣境縣志

一名清河自縣西北十五里出谷口治谷水來會東逕縣北門外東流自臨潼界入石川河通志一名曲梁水又濁谷水在三原北自耀州流入出三原孟侯原後至縣樓底鎮分數渠灌田南入清谷水耀州志其水峻急渾濁故名

趙氏河在三原縣東北縣志其上源曰澗谷河自耀州流入下流至富平科子頭與石川河會

太白渠即北白渠自涇陽三限閘北限水分東入三原

西關內支分南流者為石圪斗又東經縣城至東關外  
支分南流者為平臯小斗平臯大斗又東至曲曲灌湘  
二斗凡四斗又縣有中白毛坊原成二進下五木漲諸

渠

已上  
三原

渭水在藍屋縣北五里縣志渭河由郿縣青化堡入境  
東流逕鳳泉里四十里過縣北為武功界又東流六十  
里入興平界

韋谷水在藍屋縣西南三十五里縣志源出韋谷其正

流西逕郿縣境支流東引為韋谷渠散入縣界經啞柏鎮西北入渭

強谷水在藍屋縣西二十里縣志北流五里合稻谷水又北逕陽化舖為陽化河東北入渭

駱谷水在藍屋縣西二里縣志駱谷水正流為沙河至人遠村南合新口谷水又北逕縣東二里尖角村北入渭其支流分為廣濟渠又北至西關引為城壕東西分流又合馬家河北入渭

黑水在藍屋縣南十六里縣志黑水源出黑水谷即芒水也合韓谷黃谷諸水北流至紅崖分為盧家河又東北至沙谷堆分為泥河又東北逕黑河灣入渭

就谷水在藍屋縣東二十里縣志就谷水至三清殿軍寨之東為沙河又合飛昇谷水逕大谷村北合西觀谷水入于黑河

田谷水在藍屋縣東二十里縣志田谷水自田谷北流至大堅社為萬里河其西支流為磨渠至樓觀村合聞



仙谷水又至省村合東觀谷水其東支流為金水渠並入渭

赤谷水在藍屋縣東一名漏水縣志赤谷水自赤谷北流牛谷水注之東北合檀谷水北入渭

耿谷水在藍屋縣東五十里縣志一名白馬河北流入興平合渭水

甘谷水在藍屋縣東六十里縣志甘谷水出南山甘谷北流分二支西支流逕雙溪鎮西為沙河至宋村東北

入渭東支流逕雙溪鎮中為瑞福河至史家莊入渭

澇谷水在藍屋縣東七十里谷岸直西為藍屋縣境東  
為鄠縣境北流至澇店入興平界

仙遊潭在藍屋縣南三十里縣志即黑水潭寬二丈號  
五龍潭宋時每歲降中使投金龍祀之歲旱禱雨多應

潭上有石壁峭絕謂之蘇章石壁相傳宋蘇軾章惇同

遊惇履險以漆書壁處

宋蘇軾仙遊潭詩翠壁下無路  
何年雷雨穿光搖巖上寺深到

影中天我欲然犀看龍應抱寶眠誰  
能孤石上危坐試僧禪已上藍屋

渭水在渭南縣北四里自臨潼交口渡入縣境東逕縣城北又東入華州界

冷水在渭南縣西四十里發源馬峪北流合白莊溝水

出峽兒嶺

又北合杜化谷水

出零谷

歷新豐原北入渭

酒水在渭南縣西門外朱可衿酒水橋記酒水古首水也源出石鼓山麓與武渠羊峪大小峪曹峪清水石泉諸水合流于清澗頭迤邐而北逕縣城西門注于渭

明光峪水在渭南縣東三里縣志源出明光峪北流入

渭又縣東八里有西陽谷水又東為東陽谷水並入渭  
赤水在渭南縣東二十里華陽之界一名竹水水經注  
竹水南出竹山俗謂之大赤水太平寰宇記大赤水一  
名箭谷水縣志一名清水河北流入渭

已上  
渭南

漆沮水在富平縣西南自耀州流入又南入臨潼界括  
地志沮水一名石川河縣志漆沮水從縣西而南至盤

龍原澗谷水入之

謹按澗谷水在縣西十八里一  
名趙氏河即耀州澗谷河下流

又東流

歷荆山之陰自斷原而南溫泉河入之

澤多泉在富平縣西北即澤泉水水經注澤泉水與沮水隔原相去十五里俗謂是水為渠水東南注鄭渠合沮水縣志一名溫泉河源出縣西北仲山麓隆冬不冰又澗頭水在縣西北十里流逕懷德故城西澤多泉入之為薄臺川又流至縣北北泉入之又東至南陽村北陸川入之

在縣北五里

又至安頭之南入石川河

頻水在富平縣東北七十里通志源出頻山即大小石谷二澗水縣志頻水微甚出山不一二里即涸山前為

通川一名錦川秦王翦求美田即其地

已上富平

涇水在醴泉縣東北五十里通志自淳化縣界流入縣境又東南入涇陽界縣志涇水入縣界泔水流入焉東岸則鄭白渠所出也

泔河在醴泉縣北十里通志自乾州界流入又東合于涇水一作甘河長安志甘河自縣西北甘北鎮來至縣東北逕泔渡入涇水又作甘泉魏書地形志寧夷縣有甘泉隋書地理志醴泉縣有甘泉水

石泉谷水在醴泉縣西北四十里縣志水自石泉谷出  
兩水合流入于泔一名浪水隋書地理志醴泉縣有浪  
水太平寰宇記承陽山有石泉三輔黃圖謂之浪水

豆盧谷水在醴泉縣七十里相近有白水谷水波水谷  
水巴谷水又縣東北有巖谷水並南流入于泔水

泥河在醴泉縣城北源出泥泉東流入泔水北岸有誌  
公泉相傳梁僧寶誌卓錫於此

醴泉在醴泉縣東南三十里通志周數十步深不可測

漢宣帝時涌出隋因以名縣

龍洞渠在醴泉縣東北六十里涇陽縣志醴泉在渠上游所溉之田甚少今分王屋一二三四斗內與涇陽共

灌計田三千三百餘畝

已上醴泉

沮水在同官縣西四十餘里自宜君界逕耀州流入縣界又南流入耀州界水經注沮水謂之宜君水耀州志宜君水自州西北南入同官縣境為梁塞河又南受呂村河又西南受沙羅水又南復入州境



同官川在同官縣北五十里縣志銅官川亦謂之同水  
自縣北南流與漆水合

漆水在同官縣東北五十里縣志源出北高山西南流

合銅官川又南受雄同川水

在縣東四十里

又西南受雷平川

水

在縣西二十里

又西南入耀州界其水善溢甚為邑害

烏泥川在同官縣東北十五里通志源出鼇背山逕縣  
東南入白水縣為白水又入蒲城縣為南河又東南入  
洛

石盤川在同官縣東北三十里又有小石盤川在縣北四十里耀州志小石盤川循烏蘭山北而東流合大石盤川長安志川在烏蘭山北東流入坊州宜君縣界

已上

同官

沮水在耀州西門外自同官界流入又東南入富平界州志沮水自宜君東北界來一出銀兒坪一出太子石俱西南至楊秀川合流為宜君水又南受諸川水入同官界又南入州境為堰頭河又南受胡思泉始名沮水

過錦陽川逕州城西循西乳山受梁家泉水東會漆水合流出鶴鵲谷入富平界又通名石川河

漆水在耀州城東門外通志即同官水長安志俗名石

川河州志自同官西南入州境尹師澗水入焉

澗在五臺山北

五里又南逕城東五臺山至西乳山下合沮水

澗谷河在耀州西南十五里通志水清見石又名見底河州志水出州西北孝義鄉焦岩村東南過牛村名申家河又東南名魚池河又東南入三原界

濁谷河在耀州西南二十餘里州志水出州西北甲池堡南馬鞍口南流二十里為寶泉河又南為涼泉河又南至三原曰樓底河

清谷河在耀州西三十五里通志一名清河自三水縣流入又南入三原界州志水出州西北石門山麓南至

小邱合環河

環河在州西北六十里源出大唐山已上耀州

關中勝蹟圖志卷三

欽定四庫全書

史部

關中勝蹟圖志卷四

詳校官太僕寺少卿<sub>臣</sub>李廷欽

編修<sub>臣</sub>程嘉謨覆勘

總校官進士<sub>臣</sub>朱鈴

校對官助教<sub>臣</sub>胡予襄

謄錄監生<sub>臣</sub>呂沛惇

欽定四庫全書

關中勝蹟圖志卷四

陝西巡撫臣畢沅撰

古蹟

宮闕

西安府殷豐宮通志在鄠縣東五里小豐村詩大雅既  
伐于崇作邑于豐正義豐宮周文王宮也在雍州鄠縣  
杜預左傳注豐宮東有靈臺康王於是朝諸侯雍錄史  
記曰文王伐崇侯虎而作豐邑伐崇之後自岐遷都於

豐武王改邑於鎬豐宮元不移徙每遇大事皆步自宗周而往以其事告於豐廟

周鎬京雍勝略在長安縣西南三十里豐水東詩大雅考卜維王宅是鎬京維龜正之武王成之帝王世紀武王自豐水居鎬諸侯宗之是為宗周今豐水之東長安之南有鎬池即其故都也水經注自漢穿昆明池於是地基構淪褫今無可究

辟廱通志在鄠縣東三十里詩大雅鎬京辟廱三輔黃

圖亦曰辟廱如璧之圓雍之以水象教化流行也詩於  
論鼓鐘於樂辟廱

三代學禮記注周立三代之學學書於有虞氏之學典  
謨之教所以興也學舞於夏后氏之學文武中也學禮  
樂於商之學功成治定與已同也

冀闕通志在咸陽城中史記秦孝公作咸陽築冀闕徙  
都之

資陽宮三輔黃圖秦文王所起在鄠縣西南二十三里



漢書東方朔傳作倍陽顏師古注倍陽即萑陽也其音同耳宮名

芷陽宮通志在灞上秦襄公起

秦咸陽城雍勝略在咸陽縣東二十里三輔黃圖自秦孝公至始皇胡亥並都此城案孝公十二年作咸陽築冀闕徙都之始皇徙天下高貲富豪於咸陽十二萬戶引渭水灌都以象天漢橫橋南渡以法牽牛咸陽北至九峻甘泉南至鄠杜東至河西至汧渭之交東西八百

里南北四百里離宮別館相望聯屬木衣綈繡土被朱  
紫宮人不移樂不改懸窮年忘歸猶不能徧雍錄秦之  
咸陽孝公所都也在漢長安西北故漢書紀高帝項羽  
自霸上而入秦都皆曰西上咸陽也古語山南水北曰  
陽秦之所都若概舉其凡則在九峻諸山之南渭水之  
北若細推之則秦之朝宮苑殿固在渭北而秦都實跨  
渭水史記諸書皆云始皇都咸陽引渭水灌都以象天  
漢橫橋南渡以法牽牛此可見都之魚在渭南矣故史

記水經凡序長樂悉以其地屬之咸陽而於甘泉阿房亦自明命以為咸陽前殿也

阿房宮雍勝略故基在長安縣西三十里史記秦始皇本紀始皇帝三十五年以為咸陽人多先王之宮廷小吾聞豐鎬之間帝王之都也乃營作朝宮渭南上林苑中先作前殿阿房東西五百步南北五十丈上可以坐萬人下可以建五丈旗周馳為閣道自前殿直抵南山表南山之巔以為闕為復道自阿房渡渭屬之咸陽以

象天極閣道絕漢抵營室也計宮三百三輔黃圖阿房  
前殿以木蘭為梁以磁石為門三輔舊事阿房宮東西  
三里南北五里庭中可受十萬人車行酒騎行炙千人  
唱萬人和其外有城名阿城東西北三面有牆南面無  
牆三輔黃圖始皇收天下兵聚之咸陽銷鋒鏑以為金  
人十二以弱天下之人立于宮門坐高三丈銘其後曰  
皇帝二十六年初兼天下改諸侯為郡縣一法律同度  
量大人來見臨洮其大五丈足跡六尺

唐杜牧阿房宮  
賦六王畢四海

一蜀山兀阿房出覆壓三百餘里隔離天日驪山北構而西折直走咸陽二川溶溶流入宮牆五步一樓十步一閣廊腰縵迴簷牙高啄各抱地勢鉤心鬬角盤盤馬困困馬蜂房水渦蟲不知其幾千萬落長橋卧波未雲何龍複道行空不霽何虹高低冥迷不知西東歌臺暖響春光融融舞殿冷袖風雨淒淒一日之內一宮之間而氣侯不齊妃嬪媵嬙王子皇孫辭樓下殿華來於秦朝歌夜絃為秦宮人明星熒熒開粧鏡也綠雲擾擾梳曉鬟也渭流漲膩棄脂水也烟斜霧橫焚椒蘭也雷霆乍驚宮車過也輓輓遠聽杳不知其所之也一肌一容盡態極妍縵立遠視而望幸焉有不得見者三十六年燕趙之收藏韓魏之經營齊楚之精英幾世幾年取掠其人倚疊如山一旦不能有輸來其間鼎鑄玉石金塊珠礫棄擲遷迤秦人視之亦不甚惜嗟乎一人之心千萬人之心也秦愛紛奢人亦念其家奈何取之盡錙銖用之如泥沙使負棟之柱多於南畝之農夫架梁之椽

多於機上之工女釘頭磷磷多於在庾之粟粒九縫參差多於周身之帛縷直闌橫檻多於九土之城郭管絃嘔啞多於市人之言語使天下之人不敢言而敢怒獨夫之心日益驕固戍卒叫函谷舉楚人一炬可憐焦土嗚呼滅六國者六國也非秦也族秦者秦也非天下也嗟夫使六國各愛其人則足以拒秦秦復愛六國之人則通二世可至萬世而為君誰得而族滅也秦人不暇自哀而後人哀之後人哀之而不鑑之亦使後人而復哀後人也

信宮通志在咸陽縣渭水南史記秦始皇本紀始皇帝二十七年作信宮渭南已而更命信宮為極廟象天極自極廟道通酈山作甘泉前殿築甬道自咸陽屬之

長樂宮通志一名興樂宮在長安城中三輔黃圖秦始皇造漢修飾之周迴二十餘里漢太后嘗居之

甘泉宮雍錄古以甘泉名宮者三秦之甘泉在渭南一也漢之甘泉在雲陽縣磨石嶺上二也隋之甘泉在鄠三也秦之甘泉史嘗明言在渭之南而無言其在渭南何地者秦始皇本紀迎太后于雍而入咸陽復居甘泉宮徐廣曰表云咸陽南宮也秦時咸陽跨渭南北則此宮不在渭北之咸陽而在渭南之咸陽也又本紀曰自極

廟道通酈山作甘泉前殿自咸陽屬之則甘泉前後必  
近上林苑即酈縣也則秦之甘泉與隋之甘泉正同一  
地安知隋宮不襲秦之舊也

蘭池宮雍勝略在咸陽縣東二十五里水經注地理志  
曰渭城縣有蘭池宮秦始皇微行逢盜于蘭池

林光宮雍勝略秦時宮也故基在甘泉山上三輔黃圖林  
光宮胡亥所造從廣各五里關中記林光宮一曰甘泉宮  
秦起在今池陽縣西北故甘泉縣甘泉山上周迴十餘里



曲梁宮元和郡縣志秦曲梁宮在三原縣西南十五里  
黃白城內

步高宮雍勝略故基在渭南縣西南三十里三輔黃圖  
步高宮亦名市邱城又步高宮西有步壽宮

長楊宮雍勝略在藍屋縣東南三十三里三輔黃圖長  
楊本秦舊宮宮中有垂楊數畝因為宮名門曰射熊觀  
秦漢遊獵之所

望夷宮通志在涇陽縣東南八里長陵西北臨涇水處

史記秦二世本紀二世夢白虎齧其左驂馬殺之心不  
樂怪問占夢卜曰涇水為祟二世乃齋于望夷宮欲祠  
涇沈四白馬

漢長安故城通志在西安府城西北二十里三輔黃圖  
高祖七年築長安宮城自櫟陽徙居此城本秦離宮也  
初本狹小至惠帝更築之高三丈五尺下濶一丈五尺  
上濶九尺雉高三坂周迴六十五里城南為南斗形城  
北為北斗形至今人呼漢京為斗城是也漢舊儀曰長

安城中經緯各長三十二里十八步九百七十二頃八

街

長安志有華陽街章臺街夕陰街香室街尚冠街太常街藁街前街漢書有熾盛街

九陌三宮

九府三廟十二門九市

長安志六市在道東三市在道西

十六橋水泉

深二十餘丈城下有池周繞廣三丈深二丈石橋各六

丈與街相直三輔決錄長安城面三門四面十二門皆

通達九逕以相經緯括地志長安在渭水南隔渭水北

對秦咸陽宮漢于其地置未央宮曰長安城因名縣三

秦記長安城中地皆黑壤今城赤且堅如石如金父老

相傳云盡鑿龍首山中土以為城及諸城闕皆然雍錄  
漢都長安其城在渭之南而咸陽之東南也凡漢城之  
水皆取諸昆明第一派自西而東橫亘城南之鼎路門  
已而東折以注青門水經謂之漕渠第二支自西面南  
來周徧諸宮自清明門出城是為王渠與漕渠合北入  
渭長安圖志漢城惠帝築後趙石虎亦嘗修之苻姚西  
魏宇文皆都之隋開皇三年都龍首川此城遂廢至今  
民呼猶曰楊家城 宣平門三輔黃圖長安城東出北

頭第一門曰宣平民間所謂東都門水經注宣平門王莽更名春王門正月亭亦曰東都門 清明門三輔黃

圖長安城東出第二門曰清明一曰籍田門

以門內有籍田倉故

名一曰凱門漢宮殿疏曰第二門名城東門莽更名曰

宣德門布恩亭長安志清明門外郭門曰東平門 霸

城門三輔黃圖長安城東出南頭第一門曰霸城門水

經注王莽更名曰仁壽門無疆亭門色青又名青城門

或曰青綺門亦曰青門門外舊出佳瓜述異記景帝元

年有青雀羣飛于霸城門乃改為青雀門更修飾刻木為綺櫺崔去因名青綺門 覆盎門三輔黃圖長安城

南出東頭第一門曰覆盎門一號杜門廟記曰門外有

魯班所造橋工巧絕世長樂宮在城中近東直杜門一

曰下杜門又名端門北對長樂宮王莽更名曰永清門

長茂亭 安門三輔黃圖長安城南出第二門曰安門

亦曰鼎路門北對武庫王莽更名曰光禮門顯樂亭

西安門三輔黃圖長安城南出第三門曰西安門北對

未央宮一曰便門即平門也

謹按平便古字通

王莽更名曰信

平門誠正亭

章城門三輔黃圖長安城西出南頭第

一門曰章城門三輔舊事曰章門一曰光華門又曰便

門王莽改曰萬秋門億年亭直城門三輔黃圖長安

城西出第二門曰直城門亦曰故龍樓門門上有銅龍

本名直門王莽更曰直道門端路亭雍門三輔黃圖

長安城西出北頭第一門曰雍門本名西城門王莽改

曰章義門著義亭其水北入有函里民呼曰函里門

洛城門三輔黃圖長安城北出東頭第一門曰洛城門  
又曰高門漢宮殿疏曰高門長安北門也又曰鵲臺  
門外有漢武承露盤在臺上水經注北出西頭第三門  
本名杜門亦曰利城門王莽更名進和門臨水亭其水  
有客舍故名曰客舍門又曰洛門也 厨城門三輔黃  
圖長安城北第二門曰厨城門王莽更名建子門廣世  
亭水經注厨門其内有長安厨官故城曰厨門也如淳  
曰今名廣門 横門三輔黃圖長安城北出西頭第一



門曰橫門外有橋曰橫橋水經注橫門王莽更名霸都  
門左幽亭如淳曰音光故曰光門其外郭有都門有棘  
門徐廣曰棘門在渭北孟康曰在長安北秦時宮門也  
三輔黃圖曰棘門在橫門外按漢書徐厲軍于此又有  
通門亥門也

已上長  
安故城

長樂宮括地志在長安故城中漢書高帝本紀高帝五  
年治長樂宮三輔黃圖長樂宮本秦之興樂宮也高皇  
帝始居櫟陽七年長樂宮成徙居長安城後太后常居

之王莽改為長樂室近東直杜門關中記長樂宮周迴  
二十餘里有殿十四史記惠帝為東朝長樂及間往來  
數蹕煩人乃作複道築武庫南詔立原廟玉海長樂者  
高帝既以為居又以受朝無異于正宮矣自惠帝後人  
主皆居未央而長樂常奉母后雍錄未央在漢城西隅  
而長樂乃東隅也元和郡縣志言兩宮相去止隔一里  
此一里所即武庫漢武故事建章未央長樂三宮皆輦  
道相屬懸棟飛閣不由徑路東闕西闕釋名闕在門

兩旁中央闕然為道也漢書宣帝本紀宣帝五鳳三年  
鸞鳳集長樂宮東闕中樹上劉屈氂傳太子引兵毆四  
市人至長樂西闕下逢丞相軍合戰司馬門三輔黃  
圖未央甘泉長樂四面皆有公車司馬門凡言司馬者  
宮垣之內兵衛所在司馬主武事故謂宮之外門為司  
馬門前殿三輔黃圖長樂宮前殿東西四十九丈七  
尺兩序中三十五丈深十二丈臨華殿三輔黃圖在  
長樂前殿後武帝建漢書成帝本紀成帝永始四年夏

四月長樂宮臨華殿災 大厦殿三輔舊事秦作銅人  
立阿房殿前漢著長樂宮大厦殿前 長信宮三輔黃  
圖長信宮漢太后嘗居之按通靈記太后成帝母也后  
宮在西秋之象也秋主信故宮殿皆以長信長秋為名  
又永壽永寧殿皆后所處也雍錄黃圖曰長樂殿西有  
長信長秋永壽永寧四殿而水經注亦云殿西有長信  
長秋永壽永昌等殿則長信長秋皆在長樂宮中也長  
安志別出長信等七宮不以統諸長樂殆傳疑耶 酒

池三輔黃圖廟記曰長樂宮中有魚池酒池池上有肉炙樹秦始皇造漢武帝行舟於池中關中記酒池北起臺天子於上觀牛飲者三千人太平寰宇記武帝作酒池以誇羌人飲以鐵杯重不能舉皆牛飲水經注長樂殿之東北有池池北有臺沼謂是池為酒池非也宣德殿通光殿高明殿長安志見三輔宮殿名在長樂宮中又長樂宮有長定建始廣陽中室月室神仙椒房諸殿溫室殿漢書孔光傳或問光溫室省木皆何木也

光嘿然不應晉灼曰長樂宮中有溫室殿 鴻臺三輔

黃圖長樂宮有鴻臺秦始皇二十七年築高四十丈上  
起觀宇帝嘗射飛鴻于臺上故號鴻臺漢書惠帝四年  
長樂宮鴻臺災 鐘室漢書高帝本紀高帝十一年呂

后殺韓信于長樂鐘室師古曰謂懸鐘之室地理志未  
央殿東北二里許鐘室故處也有隙地丈餘草色皆殷

赤相傳呂后殺淮陰血漬而然

已上長樂宮

臣謹按關中古蹟宮闕於秦為盛史記始皇令咸陽

之旁二百里內宮觀二百七十複道甬道相連漢書  
賈山傳秦起咸陽而西至雍離宮三百然世移代易  
非惟建基無考抑亦名與俱湮漢之宮殿惟長樂未央  
建章為大餘如長楊五柞甘泉集靈諸宮班固所  
謂離宮別館三十六所神池靈沼往往而在其中闕  
庭神麗宮室光明張千門而立萬戶幸史記兩漢書  
及三輔黃圖西京雜記闕中記長安志雍錄雍勝略  
諸書尚存基址方位猶可得其髣髴謹備錄之并繪

圖卷內以資考証至於名雖未湮而地無可稽或宮  
不詳其基趾或殿未審其附麗而稱名舉事猶往往  
見於他說謹附載各宮篇末以竊副職詳之義其魏  
晉以後諸宮闕並倣此例

明光宮三輔黃圖武帝太初四年秋起南與長樂宮相  
連屬漢書元后傳成都侯商病欲避暑從上借明光宮  
注明光在城內近桂宮長安志王莽篡位命孺子為定  
安公孝平皇后為定安太后改明光宮為定安館定安



太后居之未央宮括地志在長安故城中近西南隅漢

書高帝本紀高帝七年蕭何治未央宮西京雜記未央

宮周迴二十二里九十五步五尺闕中記作三十三里街道周迴

七十里闕中記作十七里臺殿四十三其三十二在外其十一

在後宮闕中記作有臺三十二池十三闕中記作池十二門闔凡十五闕中

記作宮殿門八十一掖門十四三秦記未央一名紫微宮東闕漢書

高帝本紀蕭何治未央宮立東闕文帝本紀文帝七年

未央宮東闕界恩災闕中記未央宮東有蒼龍闕北

闕漢書高帝本紀顏師古注未央殿雖南向而上書奏事謁見之徒皆詣北闕公車司馬亦在北焉是則以北闕為正門而又有東門東闕至於西南兩面無門闕矣闕中記未央宮北有玄武闕闕中有閭闔門止車門

柏梁臺漢書武帝本紀武帝元鼎二年春起柏梁臺郊祀志武帝鑄柏梁銅柱三輔故事臺高二十丈用香柏為殿梁香聞十里長安志廟記曰柏梁臺漢武帝造在北闕內道西三秦記柏梁臺上有銅鳳名鳳闕

漢柏梁詩并序

漢武帝元封三年作柏梁臺詔羣臣二千石有能為七

言者乃得上坐日月星辰和四時帝驂駕駟馬從梁來

梁王孝郡國士馬羽林材大司總領天下識難治石廡

和撫四夷不易哉缺將軍刀筆之吏臣執之缺史缺大缺撞

鐘伐鼓聲中詩建大缺周宗室廣大日益滋缺宗正劉周衛

交戟禁不時缺總領從宗柏梁臺缺自祿缺國正劉周衛

謝絕缺疑缺盛缺藥與御物主治之缺少缺銅缺王陳栗萬石揚以

次之缺大缺國缺盛缺藥與御物主治之缺少缺銅缺王陳栗萬石揚以

箕缺大缺司缺農缺徵道宮下隨討治缺執缺金缺吾三輔盜賊天下危

左缺張缺成缺農缺徵道宮下隨討治缺執缺金缺吾三輔盜賊天下危

尹缺椒房率更領其材缺陳缺李缺蜜夷朝賀常舍其缺典缺屬缺柱缺枅

樽缺相支持缺臥缺批缺杷缺橘缺栗缺桃缺李缺梅缺令缺官缺走缺狗缺逐缺兔缺張缺采

思缺合缺林缺齧缺妃缺女缺脣缺甘缺如缺飴缺

人缺郭缺合缺迫缺窘缺詰缺屈缺幾缺窮缺哉缺朔缺東缺方缺

司馬門漢書元帝本紀元帝初元五年令從官給事官

司馬中者得為大父母父母兄弟通籍注應劭曰司馬中者宮內門也顏師古曰司馬門者宮之外門也衛尉有八屯衛候司馬主衛士徼巡宿衛每面各二司馬故謂宮之外門為司馬門 端門漢書周勃傳皇帝入未

央宮有謁者十人持戟衛端門師古注殿之正門也班固西都賦立金人於端闈李善注宮中門謂之闈 掖

門漢書呂后紀朱虛侯章請卒千人入未央宮掖門注顏師古曰非正門而在兩旁若人之臂掖也雍錄御覽

出禁省為殿門外出大道為掖門則不特夾立正門之  
旁為掖門雖殿門外他出之門皆可名為掖門也 前  
殿三輔黃圖未央宮前殿東西五十丈深十五丈高三  
十五丈營未央宮因龍首以制前殿至孝武以木蘭為  
焚燎文杏為梁柱金鋪玉戶華棖壁璫雕楹玉碣重軒  
鏤檻青瑣丹墀左城右平黃金為壁帶間以和氏珍玉  
風至其聲玲瓏然也長安志王莽改前殿曰王路堂  
蘭臺雍錄漢百官表御史中丞在殿中蘭臺掌圖籍秘

書外督部刺史內領侍御史受公卿奏事西京賦曰蘭  
臺金馬遞宿迭居按此蘭臺正在殿中石渠天祿皆在  
殿北 宣明殿廣明殿三輔黃圖皆在未央殿東 昆

德殿玉堂殿三輔黃圖皆在未央殿西 白虎門漢書

王莽傳王莽大置酒未央宮白虎殿勞賜將帥自前殿  
南下西出椒除白虎門注服虔曰邪行閣道下者也顏  
師古曰除殿陛之道也椒取芬香之名也 宣室三輔

黃圖未央前殿正室也漢書文帝受釐宣室夜半前席

賈生問鬼神之事即此長安志漢書宣帝嘗幸宣室齋  
居而決事如淳曰宣室宣布政教之室蓋其殿在前殿  
之側齋則居之 金馬門史記滑稽傳金馬門者宦者  
署門也門傍有銅馬故謂之金馬門漢書公孫宏傳天  
子擢宏對為第一待詔金馬門注武帝時相馬者東門  
京作銅馬法獻之立馬於魯班門外更名魯班門為金  
馬門一謂之金門長安志揚雄待詔金門金馬門也玉  
海金馬門又謂之黃門 宦者署漢書蘇武傳宣帝詔

武待詔宦者署顏師古注百官公卿表少府屬官有宦者令丞以其署親近故令於此待詔雍錄百官表有中黃門顏師古曰謂閤人居禁中在黃門之內給事者也天祿閣三輔故事在未央大殿北天祿異獸也即揚雄校書處漢宮闕疏天祿石渠蕭何造以藏秘書處賢才班固西都賦天祿石渠典籍之府石渠閣三輔故事在未央大殿之北三輔黃圖石渠門蕭何造其下礪石為渠以導水若今御溝因為閣名藏入闕所得秦之



圖籍成帝於此藏秘書焉雍錄石渠閣礎石為渠以導水以水經約其地望則滄池在未央西南此之為渠必引滄池下流轉北以行成其為渠也水之又北遂轉行乎明光桂宮之間謂之明渠也又益趨東則長樂之有酒池都城東之有王渠皆此水也 承明殿三輔黃圖

未央宮有承明殿著述之所也漢書霍光傳皇太后車駕幸未央承明殿漢書翼奉傳孝文帝躬行節儉其時未央宮無高門武臺麒麟鳳皇白虎玉堂金華之殿獨

有前殿曲臺漸臺宣室溫室承明耳

謹按承明殿一作承明廬漢書嚴助

傳嚴助為會稽太守數年不聞問賜書曰君厭承明之廬注張晏云承明廬在石渠閣外一作承明庭班固西都賦序內有承明著作之庭漢書楊雄傳客有薦雄文似相如者召雄待詔承明之庭雍錄云廬者以更直之地言之庭者以受詔作文之地言之寔即承明殿也諸志乘分而為三似誤溫室殿三輔黃

圖溫室在未央宮殿北武帝建冬處之則溫暖也

謹按孔光

傳晉灼注則溫室在長樂宮據三輔黃圖則溫室在未央宮是漢有兩溫室也

西京雜記溫室

以椒塗壁被之文繡香桂為梁設火齊屏風鴻羽帳規

地以麝賓氍毹

清涼殿三輔黃圖清涼殿在未央宮

殿北夏居之則清涼也漢書曰清室則中夏含霜此也  
高門殿三輔舊事武帝於未央宮起高門殿三輔黃  
圖汲黯請見高門注曰未央宮高門殿也哀帝時鮑宣  
諫曰陛下擢臣巖穴誠冀有益毫毛豈欲臣美食大官  
重高門之地玉海鮑宣又言高門去省戶數十步求見  
出入二年未省 玉堂殿漢書楊雄傳厯金門上玉堂  
注晉灼曰黃圖有大玉堂小玉堂殿李尋傳注顏師古  
曰玉堂殿在未央宮 長秋門漢書戾太子傳太子使

舍人無且持節夜入未央宮殿長秋門因長御倚華具  
白皇后 內謁者署三輔黃圖在未央宮屬少府掌宮  
中步帳褻物 椒房殿三輔宮殿名未央宮有椒房殿  
漢官儀皇后殿稱椒房以椒塗室主溫暖除惡氣也

掖庭漢書元帝本紀賜單于待詔掖庭王嬙為閼氏漢  
官儀婕妤以下皆居掖庭有月景臺雲光殿光華殿鳴  
鸞殿開襟閣臨池觀不在簿籍皆繁華窈窕之所棲宿  
焉 昭陽殿三輔黃圖成帝趙皇后居昭陽殿漢書外

戚傳皇后既立寵少衰而弟絕幸為昭儀居昭陽舍班固西都賦昭陽特盛隆於孝成屋不呈材牆不露形三輔黃圖武帝時後宮八區有昭陽飛翔增城合歡蘭林披香鳳皇鴛鴦等殿後增修安處常寧茝若椒風發越蕙草等殿為十四位 增城舍長安志漢書曰班婕妤居增城舍應劭曰後宮有八區增城第三也 椒風舍漢書董賢傳董賢女弟為昭儀位次皇后更名其舍為椒風以配椒房云 漸臺闕中記未央宮西有滄池池

中有漸臺雍錄未央宮有漸臺文帝之夢鄧通王莽之  
死於兵皆在其處黃圖曰滄池其水滄色 麒麟殿三

輔黃圖未央宮中麒麟殿漢書哀帝燕董賢父子於麒  
麟殿 金華殿三輔黃圖未央宮中有金華殿漢書敘

傳上方向學鄭寬中張禹朝夕入說尚書於金華殿

宴昵殿漢書敘傳班伯少受詩於師丹大將軍王鳳薦  
伯宜勸學召見宴昵殿 武臺殿三輔舊事武帝於未

央宮起武臺殿 猗蘭殿漢武故事王美人七月七日

旦生武帝於猗蘭殿漢武內傳景帝夢一赤兔從雲中  
直入崇芳閣覺而坐閣下果有赤龍如霧來蔽戶牖使  
王夫人移居崇芳閣乃改閣為猗蘭殿 白虎殿三輔

黃圖未央宮有白虎殿漢書王商傳河平四年單于來  
朝引見白虎殿 曲臺殿漢書孟卿傳后蒼說禮數萬

言號曰后氏曲臺記顏師古注曲臺殿在未央宮 飛

羽殿漢書元后傳太后冬饗飲飛羽顏師古注飛羽殿

在未央宮中羽或作雨 敬法殿漢書王莽傳燒作室

門斧敬法閨顏師古注敬法殿名 鳳皇殿三輔黃圖

在未央宮又未央宮有通光殿鈎弋殿壽成殿萬歲殿  
永延殿壽安殿平就殿宣德殿東明殿又神明殿見漢  
武故事延年殿合歡殿四車殿見三輔決錄宣平殿長  
年殿見漢宮闕疏朱鳥堂見漢宮殿疏 麒麟閣漢書

蘇武傳上思股肱之美迺圖畫其人於麒麟閣注張晏  
曰武帝獲麒麟時作此閣遂以為名唐六典注麒麟閣  
亦藏書又白虎閣屬車閣堯閣三輔黃圖俱在未央宮



織室漢書百官表少府有東織西織令丞河平元年  
省東織更名西織為織室三輔黃圖未央宮有東西織  
室織作文繡郊廟之服有令史 凌室三輔黃圖未央  
宮藏冰之室 暴室三輔黃圖在未央宮漢書宣帝本  
紀注應劭曰暴室者宮人獄也今曰薄室師古曰暴室  
者掖庭主織作染練之署謂之暴室者取暴曬為名耳  
或謂薄室者薄亦暴也今俗語云暴曬蓋暴室織務既  
多因為置獄主治其罪人故往往謂之暴室獄耳本非

獄也 郎中府漢書高后本紀注如淳曰百官表令郎  
中掌宮殿門戶故其府在宮中後轉為光祿勳 四寶  
祠漢書郊祀志宣帝以方士言為隨侯劔寶玉寶璧周  
康寶鼎立四祠于未央宮中 弄田三輔黃圖在未央  
宮弄田燕遊之田天子所戲弄耳漢書昭帝紀曰始元  
元年上耕於鉤盾弄田應劭注云帝時年九歲未能親  
耕帝籍鉤盾宦者近署故往試耕為戲弄成帝建始三  
年小女陳持弓年九歲闌入尚方掖門至未央殿鉤盾

禁中 青瑣門三輔黃圖未央宮有青瑣門漢舊儀黃  
門郎屬黃門令日暮入對青瑣門拜名曰夕郎漢書元  
后傳注顏師古曰青瑣門刻為連瑣文而以青塗之也  
作室門漢書成帝本紀成帝為太子初作桂宮上急  
召太子出龍樓門不敢絕馳道西至直城門得絕乃度  
還入作室門 鈎弋臺三輔黃圖在未央宮又未央宮  
有東山臺西山臺鈎臺見三輔故事 路軫殿三輔黃  
圖在未央宮掌宮中輿馬亦曰未央殿漢書曰武帝時

期門郎上官桀遷為未央殿令 虎圈彘圈虎圈凡九

彘圈一三輔黃圖俱在未央宮文帝問上林尉及馮妃

當熊皆此處虎圈上有樓觀

已上未央宮

北宮漢書外戚傳注顏師古曰未央宮之北三輔黃圖

北宮在長安城中近桂宮周迴十里高帝時初孝成增

修之 東交門漢書東方朔傳武帝從董偃遊戲北宮

馳逐平樂觀有詔置酒北宮引董君從司馬門入更名

東交門 前殿三輔黃圖北宮有前殿廣五十步珠簾

玉戶如桂宮 紫房複道漢書孔光傳大司空何武曰  
定陶太后可居北宮宮有紫房複道朝夕至哀帝所

壽宮三輔黃圖北宮有神仙宮壽宮張羽旗設供具以  
禮神君神君來則肅然風生帷帳皆動 太子宮漢書

成帝本紀孝成皇帝元帝太子也母曰王皇后元帝在

太子宫生甲觀畫堂

謹按太子宮未詳所在三輔黃圖  
敘入北宮今從之 已上北宮

桂宮元和郡縣志在長安故城中三輔黃圖漢武帝造  
周迴十餘里水經注未央宮北即桂宮舊乘複道用相

逕通故渠出二宮之間謂之明渠班固西都賦輦路經  
營修塗飛閣自未央而連桂宮張衡西京賦鈎陳之外  
閣道穹窿屬長樂於明光徑北通乎桂宮西京雜記武  
帝為七寶牀雜寶案厠寶屏風列寶帳設於桂宮時人  
謂為四寶宮 龍樓門漢書成帝本紀成帝為太子居  
桂宮上嘗急召太子出龍樓門注張晏曰門樓有銅龍  
若白鶴飛廉之為名也 鴻寧殿漢書五行志桂宮鴻  
寧殿灾帝祖母傅太后之所居也 明光殿闕輔記桂

宮中有明光殿土山複道從宮中西上城西至建章宮  
神明臺蓬萊山三秦記未央宮漸臺西有桂宮中有明  
光殿皆金玉珠璣為簾箔綴明月珠金砌玉階晝夜光  
明 走狗臺三輔黃圖桂宮有走狗臺又有商臺避風

臺

已上  
桂宮

建章宮雍勝略在長安故城西漢書武帝本紀太初元  
年二月起建章宮注顏師古曰在未央宮西今長安故  
城西俗所稱貞女樓即此宮之闕也郊祀志建章宮度

為千門萬戶關中記建章周迴二十餘里張衡西京賦  
柏梁既灾越巫陳方建章是經用厭火祥營宇之制事  
魚未央雍錄三輔舊事關中記皆言建章在城西上林  
之地東方朔傳曰陛下以城中為小圖起建章長安記  
曰王莽壞城西苑中建章十餘所取其材為九廟師古  
曰自建章以下皆在上林苑中關中記上林苑中有宮  
十二建章其一然建章如此其侈而正史少曾正書臨  
幸則皆從飛閣越城以出也 飛閣三輔黃圖武帝於



未央營造日廣以城中為小乃於宮西跨城池作飛閣  
通建章宮構輦道以上下雍錄案建章宮在長安城外  
與未央諸宮隔城相望故跨城而為閣道尤與常異

閭闔門三輔黃圖宮之正門曰閭闔門高二十五丈亦  
曰壁門漢書曰建章宮南有玉堂壁門三層臺高三十  
丈玉堂內殿十二門階陛皆玉為之鑄銅鳳高五尺飾黃  
金樓屋上下向風若翔椽首薄以壁因名壁門 鳳闕  
史記封禪書建章前殿度高未央其東則鳳闕索隱曰

三輔黃圖武帝營建章起鳳闕高二十五丈三輔黃圖  
壁門左鳳闕張衡西京賦設壁門之鳳闕上觚稜而棲  
金雀闕輔古語俗謂鳳皇闕為貞女樓 神明臺三輔  
黃圖壁門右神明臺漢書曰建章宮有神明臺廟記曰  
神明臺武帝造祭金人處上有承露盤有銅仙人舒掌  
捧銅盤玉杯以承雲表之露以求仙道長安記仙人掌  
大七圍以銅為之漢宮闕疏神明臺高五十丈常置九  
天道士百人水經注神明臺有九室俗謂之九子臺而

實非也後有疏園神明堂 圓闕三輔黃圖建章宮門

北起圓闕高二十五丈上有銅鳳皇赤眉賊壞之西京

賦圓闕聳以造天若雙闕之相望是也長安志古歌辭

所謂銅雀即銅鳳也

古歌長安城西雙圓闕上有一雙銅雀宿一鳴五穀生再鳴五穀熟

謹按史記建章鳳闕高二十餘丈即西京賦所云設壁門之鳳闕也又闕中記建章宮圓闕有金鳳在上故

號鳳闕似又以圓闕為鳳闕矣然唐王維詩云雲裏帝城雙鳳闕似壁門圓闕上並有鳳皇故皆稱鳳闕至唐

而遺址尚存因並著之

別風闕西京賦閭闔之內別風嶢嶢闕中

記別風以言別四方之風也玉海閭闔門內東出有析

風閣一名別風 嶠闕長安志廟記曰建章宮有嶠  
峽闕薛綜注次門女闕也在圓闕門內二百步 井幹  
樓史記封禪書武帝作建章宮乃立神明臺井幹樓度  
五十丈輦道相屬漢宮闕疏神明井幹俱高五十丈井  
幹樓積木而高為樓若井幹之形也井幹者井上木欄  
也其形或四角或八角張衡西京賦井幹疊而百層三  
輔黃圖別風闕對峙井幹樓各高五十丈輦道相屬  
前殿漢書郊祀志建章前殿度高未央 唐中庭史記

封禪書建章宮西則唐中數十里索隱唐堂庭也爾雅以廟中路謂之唐西京賦前開唐中彌望廣濶是也一作商中漢書郊祀志建章宮西則商中數十里注如淳曰商中商庭也顏師古曰商金也於序在秋故謂西方之庭為商庭 鼓簧宮三輔黃圖漢宮闕疏云鼓簧宮周匝一百三十步在建章宮東旁有承光宮 奇華宮三輔黃圖在建章宮旁四海夷狄器服珍寶火浣布切玉刀巨象大雀師子宮馬充塞其中又有奇寶殿 杙

詣宮三輔黃圖杙詣木名宮中美木茂盛也 駘蕩宮

三輔黃圖春時景物駘蕩滿宮中也 駘婆宮三輔黃

圖駘婆馬行疾貌馬行迅速一日之間遍宮中言宮之

大也 天梁宮三輔黃圖梁至於天言宮之高也 函

德殿三輔黃圖建章宮有函德承華鳴鸞等二十六殿

漢書宣帝本紀神爵元年三月詔曰金芝九莖產於函

德殿銅池中 涼風臺關中記建章宮北作涼風臺積

木為樓高五十餘丈 避風臺關中記太液池有避風

臺即飛燕結裾之處 曝衣閣卜子陽園苑疏太液池

西有武帝曝衣閣常至七月七日宮女出后衣登樓曝

虎圈漢書郊祀志建章宮西虎圈注顏師古曰於菟

亦西方之獸故於此置其圈也 太液池史記封禪書

建章宮治大池漸臺高二十餘丈命曰太液池中有蓬

萊方丈瀛洲象海中神山索隱三輔故事云池北岸有

石魚長二丈廣五尺西岸有龜二枚各長六尺又唐中

池三輔黃圖周迴十二里在建章宮太液池南又孤樹

池西京雜記在太液池西池中有一洲上黏樹一株六十餘圍望之重重如車蓋故取為名又淋池拾遺記昭帝元始元年穿淋池廣千步東引太液之水池中植分枝荷一莖四葉狀如駢蓋又影娥池三輔黃圖武帝鑿以玩月其傍起望鵲臺以眺月影入池中使美人乘舟弄月影名影娥也亦曰眺蟾臺北闕廟記高二十丈建章宮北闕門也

已上建章宮

鈎弋宮漢武故事在直門之南列仙傳鈎弋夫人姓趙



氏河間人見召武帝命所居曰鈞弋宮 堯母門漢書

趙婕妤傳趙婕妤居鈞弋宮太始元年生昭帝號鈞弋

子十四月乃生命所生門曰堯母門

已上鈞弋宮

宜春宮漢書東方朔傳建元三年武帝微行東遊宜春  
注顏師古曰宜春宮在長安東南說者乃以為在鄠非  
也在鄠者自是宜春觀耳在長安城西豈得言東遊也  
司馬相如上林賦注顏師古曰宜春宮名在杜縣東即  
今曲江池是其地也

扶荔宮三輔黃圖在上林苑中漢武帝元鼎六年破南越起扶荔宮以植所得奇草異木

儲元宮通志在漢長安城中長安志馮昭儀與子信都王居儲元宮顏師古曰在上林苑中

宣曲宮三輔黃圖在昆明池西孝宣帝曉音律嘗於此度曲因以為名

太乙宮通志在西安城南五十里太乙山谷中漢元封初南山谷間雲起融結成象武帝於此建宮

櫟楊宮唐書盧懷慎傳高祖受命五日一朝太公於櫟  
楊宮

豫樟宮述異記漢武帝寶鼎二年立豫樟宮於昆明池  
中作豫樟亭

昭臺宮三輔黃圖在上林苑中孝宣霍皇后處昭臺宮  
長門宮通志在長安城東三輔黃圖孝武陳皇后居長  
門宮長安志顧成廟無宿宮竇太主獻長門園如淳曰  
園在長門長門在長安城東南園可以為館宿處所故

獻之上大喜更名竇太主園為長門宮今按漢書長安城無名長門者

夫臺宮三輔黃圖在上林苑中長安西二十八里漢書江充召見夫臺宮注晉灼曰上林有夫臺宮外有走狗觀

明堂三輔黃圖在長安城西南七里漢書武帝本紀武帝初即位嚮儒術以文學為本議立明堂於城南以朝諸侯

黃山宮三輔黃圖在興平縣西三十里武帝微行西至黃山宮即此也漢書地理志右扶風槐里縣有黃山宮池陽宮元和郡縣志在涇陽縣西北八里三輔黃圖池陽宮在池陽南上原之陂有長年陂去長安五十里

長楊宮雍勝略在藍屋縣東南三十二里三輔黃圖本秦舊宮至漢修飾之以備行幸宮中有垂楊數畝因為宮名 長楊榭三輔黃圖在長楊宮秋冬校獵其下命武士搏射禽獸天子登此以觀焉 射熊館三輔黃圖

在長楊宮武帝好自擊熊司馬相如作賦諫焉

漢揚雄長楊賦

子墨客卿問於翰林主人曰蓋聞聖主之養民也仁霑而恩洽動不為身今年獵長楊先命右扶風左太華而右褒斜椽截薛而為代紆南山以為置羅千乘於林莽列萬騎於山隅帥軍踣陸錫戎獲胡獫狁熊羆拖豪豬木樵槍纍以為儲胥此天下之窮覽極觀也雖然亦頗擾於農民三旬有餘其厯至矣而功不圖恐不識者外之則以為娛樂之遊內之則不以為乾豆之事豈為民乎哉且人君以元默為神澹泊為德今樂遠出以露威靈數搖動以罷車甲本非人主之急務也蒙竊惑焉翰林主人曰吁客何謂茲邪若客所謂知其一未觀其二見其外不識其內者也僕嘗倦談不能一二其詳請略舉其凡而客自覽其切焉客曰唯唯主人曰昔有彊秦封豕其土寔窳其民鑿齒之徒相與摩牙而爭之豪俊靡沸雲擾羣黎為之不康於是上帝眷顧高祖高祖受命

順斗極運天關橫鉅海漂崑崙提劍而叱之所過摩城  
斬邑下將降旗一日之戰不可殫記當此之勤頭蓬不  
暇梳飢不及餐羈輦生蠱蟲介冑被雷汗以為萬姓請  
命乎皇天迺展民之所屈振民之所乏規億載恢帝業  
七年之間而天下密如也逮至聖文隨風垂流方垂意  
於至寧躬服節儉緇衣不敝草踏不穿大厦不居木器  
無文於是後宮賤瑇瑁而踈珠璣却翡翠之飾除雕琢  
之巧惡麗靡而不近斥芬芳而不御抑止絲竹宴衍之  
樂憎聞鄭衛幻眇之音是以玉衡正而泰階平也其後  
獯鬻作虐東夷橫叛羌戎睚眦閩越相亂遐氓為之不  
安中國蒙被其難於是聖功勃怒爰整其旅迺命驃衛  
紛紜沸渭雲合電發森騰波流機駭蠱軼疾如奔星擊  
如震霆碎輶輻破穹廬腦沙幕髓余吾遂躡乎王庭驅  
索駝燒燔蠡分勢單于磔裂屬國夷阮谷拔鹵莽刊山  
石蹂屍與厠係累老弱吮鋌癰者金鉞淫夷者數十萬  
人皆稽顙樹頌扶服蛾伏二十餘年矣尚不敢惕息夫

天兵四臨幽都先加迴戈邪指南越相夷靡節西征羌  
焚東馳是以遐方踈俗殊鄰絕黨之域自上仁所不化  
茂德所不綏莫不躋足抗手請獻厥珍使海內淡然永  
亡邊城之災金革之患今朝廷純仁尊道顯義并包書  
林聖風雲靡英華沈浮洋溢八區普天所覆莫不沾濡  
士有不談王道者則樵夫笑之意者以為事罔隆而不  
殺物靡盛而不虧故平不肆險安不忘危迺時以有年  
出兵整輿竦戎振師五柞習馬長楊簡力狡獸校武票  
禽乃萃然登山瞰鳥弋西厭月窟東震日域又恐後  
世迷於一時之事常以此為國家之大務淫荒田獵陵  
夷而不禦也是以車不安轡日未靡旃從者彷彿飢屬  
而還亦所以奉太尊之烈遵文武之度復三王之田反  
五帝之虞使農不輟耰工不下機婚姻以時男女莫違  
出愷弟行簡易矜劬勞休力役見百年存孤弱帥與之  
同苦樂然後陳鍾鼓之樂鳴鞀磬之和建碣磬之虞拮  
隔鳴球掉八列之舞酌允鑠有樂胥聽廟中之雍雍受



神人之福祐歌投頌吹合雅其勤若此故真神之所勞也方將俟元符以禪梁父之基增泰山之高延光於將來比榮乎往號豈徒欲淫覽浮觀馳騁稻之地周流梨栗之林蹂踐芻蕘誇詡衆庶盛歎獲之收多麋鹿之獲哉且盲者不見咫尺而離婁燭千里之隅客徒愛胡人之獲我禽獸曾不知我亦已獲其王侯言未卒墨客再拜稽首曰大哉體乎允非小人之所能及也乃今日發矇廓然已昭矣已上長楊宮

五柞宮雍勝略在藍屋縣東南三十八里漢書武帝本紀武帝後元二年幸藍屋作五柞宮三輔黃圖漢之離宮也宮中有五柞樹因以為名青梧觀西京雜記五柞宮西有青梧觀觀前三梧桐樹樹下有石麒麟二

枚刊其脇為文字是秦始皇驪山墓上物也

已上五  
柞宮

葡萄宮雍勝略在藍屋縣境十道志葡萄宮在上林苑  
西漢書匈奴傳元壽元年單于來朝以太歲厭勝所在  
舍之上林苑葡萄宮

醴泉宮通志在醴泉縣東南三十里漢宣帝聞泉味如  
酒因以建宮唐貞觀重修縣因以名

步壽宮通志在耀州東北一里漢書郊祀志神爵二年  
正月鳳皇集役祠於所集得玉寶起步壽宮三輔黃圖

秦亦有步壽宮今按其地與漢異則秦漢各有步壽宮耳

後漢獻帝宮長安志在長安故城中本京兆府舍也帝王世紀獻帝聞關東兵起董卓遷帝都長安見未央等宮遭赤眉之亂宮室廢弛故居京兆府舍

晉太極殿周地圖記晉愍帝之宮在長安南門後姚興重建

西宮晉書前趙載記劉曜命起鄴明觀立西宮

太極前殿晉書前秦載記苻堅入長安稱天王大單于  
繕宗廟社稷置百官僭即皇帝位於太極前殿

東宮晉書前秦載記苻健疾苻菁勒兵入東宮將殺苻  
生時生侍健疾菁迴攻東掖門健聞變升端門陳兵執  
菁殺之

平朔門晉書前秦載記苻健置來賓館於平朔門

雲龍門長安志清河王苻法率壯士入雲龍門廢苻生  
而立苻堅

明光殿長安志明光殿者秦苻堅之殿也

露堂晉書前秦載記苻堅將為赦與王猛苻融密議於露堂

明堂晉書前秦載記苻堅起明堂祀其伯健以配上帝  
東闕晉書前秦載記苻堅僭位五年鳳皇集於東闕  
西堂長安志車師前部鄯善王林密馱朝於秦堅賜以  
朝服引見於西堂

徽音堂長安志在惡犬城之外苻氏造也

永安宮長安志永安姚萇宮也

東堂晉書後秦載記姜龕淳于岐郭高等皆耆儒碩德  
興每於聽政之暇引龕等於東堂講論道藝錯綜名理  
諮議堂晉書後秦載記姚興常臨諮議堂聽決疑獄於  
時號無冤滯

西宮長安志姚興立姚見子監國入居西宮

黃龍門長安志姚興之宮門也

秦王殿通志在耀州北七十里今遺瓦殿基尚在耀州

志上有御池泉即古鳳遊鄉也晉太元十一年苻堅將姚萇背堅起兵北地自立為王國號秦秦王殿蓋始於此南三十里入淳化境又有萇按軍厰云

魏孝武帝宮北史魏孝武帝本紀永熙三年高歡入洛宇文泰迎帝入長安以雍州公廨為宮

清暉室長安志魏文帝大統四年祀天於清暉室

陽武門北史魏文帝本紀文帝大統五年十月於陽武門外縣鼓置紙筆以求得失

憑雲觀北史魏文帝本紀大統七年十二月帝御憑雲觀引見諸王敘家人之禮

乾安殿

謹按長安志西魏有乾安殿周書閔帝紀會百官於乾安殿班賞各有差周承西魏都邑不改

意此殿則自西魏而後周襲之歟

後周延壽殿周書明帝本紀明帝元年九月朝羣臣於

延壽殿

正武殿長安志周明帝武帝並聽訟於正武殿

麟趾閣周書蕭大圜傳蕭大圜恒以讀詩禮書易為事



開麟趾殿招集學士大園預焉

露門周書武帝本紀武帝建德三年正月壬戌朝羣臣於露門玉海保定中置露門學

大德殿周書武帝本紀武帝天和三年八月帝御大德殿集百僚及沙門道士等親講禮記

咸陽宮周書宣帝本紀宣帝大象二年四月祈雨至咸陽宮

醴泉宮周書武帝本紀武帝天和二年五月行幸醴泉

宮雲陽宮北史後周有雲陽宮

紫極宮見長安志又正陽宮天興宮崇義宮大武殿崇  
信殿會義殿含仁殿雲和殿思齊殿太極殿天德殿連  
珠殿重陽閣雲和樓天臺通道觀軍器監津門肅章門  
青城門青門應門皆後周所有

隋大興京城隋書文帝本紀開皇二年六月詔左僕射  
高頴等創造新都于龍首山十二月名新都曰大興  
城地理志開皇三年置雍州東西十八里南北十五里

各一百七十五步東面通化春明延興三門南面啟夏  
明德安化三門西面延平金光開遠三門北面光化一  
門里一百六十步二長安志隋文帝開皇二年自故都徙  
其地在漢故城之東南屬杜縣周之京兆郡萬年縣界  
雍錄宇文愷之營隋都也曰朱雀街南北盡郭有六條  
高坡象乾卦六爻故於九二置宮殿以當帝王之居九  
三立百司以應臣子之數九五貴位不欲常人居之故  
置元都觀及興善寺以鎮其地

皇城長安志亦曰子城東西五里一百一十五步南北三里一百四十步城中南北七街東西五街其間並列臺省寺衛自西漢以後至於宋齊梁陳並有人家在宮闕之間隋文帝以為不便於是皇城之內惟列市府不使雜人居止

大興宮通志隋文帝建以城名 大興殿通志宮城之正殿也隋書文帝本紀開皇四年宴突厥高麗吐谷渾使者于大興殿 中華殿通志在大興殿後 臨光殿

隋書文帝本紀開皇元年二月上自相府常服入宮脩  
禮卽皇帝位于臨光殿 昭陽門通志在大興殿之南  
開皇二年作初名唐陽門仁壽二年改今名又大興宮  
之南門為建春門後改通訓門北門為大興門後改乾  
福門

已上大興宮

觀德殿隋書文帝本紀開皇二年十月上疾愈享百僚  
于觀德殿賜錢帛任其自取盡力而出

射殿隋書文帝本紀開皇六年九月上御射殿召百僚射

文思殿隋書文帝本紀開皇十一年春正月上御文思殿

嘉則殿隋書文帝本紀開皇十三年二月宴考使於嘉則殿

武德殿隋書文帝本紀開皇十九年大射武德殿宴賜百官

允武殿隋書煬帝本紀大業五年正月百僚大射于允武殿

崇德殿隋書煬帝本紀大業五年二月上御崇德殿之  
西院

大業殿隋書煬帝本紀大業十二年春正月夜有二大  
鳥似雕飛入大業殿

宣仁門隋書文帝本紀開皇元年三月宣仁門槐樹連  
理衆枝內附

建國門隋書煬帝本紀大業六年正月有盜數十人入  
自建國門

端門街隋書煬帝本紀大業六年正月角抵大戲于端

門街天下奇技異藝畢集終月而罷

謹按已上殿八門二街一據書傳所

載皆在大興城中

東宮朝堂通志在皇城內

長樂宮隋書地理志京兆郡大興有長樂宮通志望春

宮在西安府城東十里隋文帝建煬帝改名曰長樂宮

仙都宮福陽宮隋書地理志京兆長安有仙都福陽等宮

仙林宮通志在興平縣西十八里隋文帝置



太平宮通志隋建在鄠縣東南三十里草堂寺唐高祖避暑處

遊仙宮通志在藍屋縣南三十五里舊圖經曰隋文帝避暑於此

宜壽宮通志隋離宮在宜壽城中

謹按通志宜壽城在藍屋縣南三十里

崇業宮通志在渭南縣東十五里煬帝大業二年建

醴泉宮隋書文帝本紀開皇七年二月車駕幸醴泉宮

關中勝蹟圖志卷四